

鑑如先生墓表

君諱昌蔭本名兆鴻字鑑如平江人也其先六世祖玉恆自黃
州來遷高祖仕芳道拾遺金認還其主曾祖世英祖祿齋父復
吾皆窮經砥行潛德勿曜君幼秉慧異始立則貧軫懷清門下
帷力學芳潤六藝高蹠一州爲縣學附生求誨盈門樂於色養
母晚病痿意有所需未召輒喻刑家黽勉修脯辟纊悉以私儲
內諸析箸友悌樂其仁慈子姓憚其嚴整凡有佚行戒恐君知
君或微言退各慙改丙午歲饑殃徒剽及君家衆請鳴縣按捕
亟誠止之童姓葬親侵入祖塋族衆迫遷童難改寔君託夢驗

界以止爭鄰畦蔬竊蒙辱自經賴君釋閔捐金掩葬里庶感戢
嘗誡諸子曰積貴能散曷貴多藏諱繼殖躬乃爲無忝咸同軍
興湘團稱最平邑富庶理董最久團穀四十時其藏糶累息十
倍以措諸務又獨捐費千緡備穀千石其於恤災毫末必謹蒙
其佑者咸曰陳君先幾利非一世改步多故吏暴威于上民叢
巧于下苟欲激揚羣囁迂拙然君質直好義動息稱願在家必
達其賢遠矣天不憖遺以丙辰歲五月二十五日正命于寢年
八十三配潘氏繼配張氏子日新附貢生又新郡廩生畢業日
本明治大學女二長適江孝源次適江炳勛俱潘出孫男七人

曾孫十七人日新等既依禮祔葬君於十六都仁里塋董家嘴
先隴乃具狀乞辭表墓頌萬議德考行以爲君之秉節則貞以
廉君之致身則窮以立君之與人壹繇仁恕君之閑家毋僇禮
儀溫溫恭人惟德之基漪歟休哉有道君子也爰述所審伐石
慰哀俾志乘有徵奕世足詔

清誥授資政大夫二品頂戴湖北候補道甯鄉程頌萬頓首拜
撰